

佛說菩薩內戒經

言八

劉宋三藏求那跋摩譯

佛以十五日說戒時文殊師利正衣服以頭腦著佛足起長跪白佛言若有初發意菩薩於道於俗當用何等功德以開化一切衆生使各得成其功德惟佛當以漚沱拘舍羅爲我曹分別說之佛言善哉善哉文殊師利若所問甚深甚深多所過度多所安隱若諦聽諦受吾當爲說若具說其要各自以意施行之諸在會者及文殊師利皆言受教佛言當

先三自歸三尊當言某自歸佛自歸法自歸比丘僧自歸菩薩自歸摩訶薩自歸文殊師利菩薩自歸摩訶般若波羅蜜某身作惡口言惡意念惡不知故作後不復作菩薩十萬劫常行四等心某從十萬劫以來身作惡口言惡意念惡不知故作後不復作某先世時不行菩薩道今適行菩薩道以棄惡故從今以往晝夜作善不敢復犯諸惡波藍質兜波初發意菩薩當行六波羅蜜何謂六第一檀波羅蜜布施意行第二尸波羅蜜持戒意行

言八

第三羣提波羅蜜忍辱意行第四惟逮波羅蜜精進意行第五禪波羅蜜一心意行第六般若波羅蜜智慧意行若見人分檀布施正心代其歡喜若見人持戒正心代其歡喜若見人忍辱正心代其歡喜若見人精進正心代其歡喜若見人坐禪正心代其歡喜若見人智慧說經正心代其歡喜菩薩當知三願乃為菩薩何謂三一願我當作佛我當作佛時令國中無有三惡道者皆有金銀水精瑠璃七寶人民壽無極皆自然飯食衣被五樂

倡妓宮殿舍二願我往生阿彌陀佛前三願我世世與佛相值佛當授我別是為三願合會為千五戒具菩薩所當奉行起闍名明師阿祇利名文殊師利前已過去菩薩皆從波藍質兜波發意行菩薩道自致得作佛無有菩薩亦無有佛是故當行菩薩道當作佛菩薩入塔寺有五事入塔寺不得著屐入塔寺不得持繖蓋入塔寺當禮佛遶塔三匝入塔寺若見不淨汙穢當掃棄入塔寺見諸沙門皆當作禮菩薩行道路有二事若天熱若雨

三八

二

時見有樹木屋舍當讓人先坐若見井水泉水若見人持水當讓人飲若見大溪水極自飲是爲二事菩薩得人飲食時有三事視上下皆令等若不等得當分令等飯已得水飲當讓上座先飲若飲已不得先起去當與衆人俱起是爲十法則第一時南無佛今受尸羅四十七戒何謂四十七一者菩薩不得殺生身口意不得念殺生念殺生者不得爲菩薩也二者菩薩不得盜他人財物三者菩薩不得姪洩他人婦女四者菩薩不欺怠人五

者菩薩不得飲酒六者菩薩不得兩舌七者菩薩不得惡口八者菩薩不得妄言九者菩薩不得綺語十者菩薩不得嫉妬十一者菩薩不得瞋恚十二者菩薩不得癡疑十三者菩薩不得信邪魔道十四者菩薩不得持惡行教人十五者菩薩當廣方便益布施十六者菩薩不得慳貪十七者菩薩不得貪利他人財物十八者菩薩不得邪心賊害人十九者菩薩不得讒擊人二十者菩薩不得撻捶人二十一者菩薩不得掠取良民作奴婢二

十二者菩薩不得販賣奴婢二十三者菩薩不得賣妻子與人二十四者菩薩不得男子更相姪戲二十五者菩薩不得至博戲姪女舍二十六者菩薩不得至黃門家二十七者菩薩不得相欺詐二十八者菩薩不得持重秤侵人二十九者菩薩不得持輕秤欺人三十者菩薩不得持大斗侵人三十一者菩薩不得持小斗欺人三十二者菩薩不得持長尺侵人三十三者菩薩不得持短尺欺人三十四者菩薩不得斷棄牛馬五陰三十五者

菩薩不得賣牛馬三十六者菩薩不得賣象駝三十七者菩薩不得賣騾驢三十八者菩薩不得賣豬羊三十九者菩薩不得賣雞犬畜生四十者菩薩不得賣經法四十一者菩薩不得至邪魔道家四十二者菩薩不得至擔死人種家四十三者菩薩不得入死喪家四十四者菩薩不得入酒舍四十五者菩薩不得入羹飯舍四十六者菩薩得人飯時心念言我何時當布施與人令飽滿如我今日四十七者菩薩相見心當歡喜如見父母兄

弟見他人亦爾無有異若見人作菩薩道行當等心視之不得言某人善某人惡是爲四十七戒具菩薩身口意不得犯十惡不得教人犯亦不得勸勉人犯之晝夜思惟我持是戒堅住不動會當得三術一者得阿惟越致

二者得阿惟顏言八三者當得作佛

第二時

南無佛今受羣阿惟越致法四門何謂四佛二十因緣法二十因緣身二十因緣摩訶般若波羅蜜二十因緣何謂佛二十因緣是爲

佛多陀阿伽度阿羅呵三耶三佛陀術闍發心所念天眼洞視預知他人心中所念遮蘭那身口心所行三般術闍遮蘭那三般是三蓋乃成須迦頭須迦頭是泥洹由迦庇多世間之父阿耨多羅天上天下無有在其上者浮溜沙勇猛男子曇摩沙羅祁曇摩者法沙羅祁者馭法世多提惹摩耨沙那教天上天下人佛陀波迦起正蹈地足下平行時直舉足手指間網相連紫磨金色兩手兩肩項上有浮肉頰車如師子四十齒正白平出舌

入耳入目入鼻自覆面肉髻是爲佛二十種
因緣何謂法二十因緣阿術闍本癡僧迦羅
所爲惟然那知衆事那摩留波那摩名留波
明所見沙羅耶多那福罪法來至波利眼耳
鼻口身意痛癢愁檀那若病未差時愁毒痛
若病已差快痛三根那迦摩怛那波愁怛那
惟波愁怛那男子女人所愛樂願欲作天作
人願令我身富貴無有極漚波他那師使弟
子授教作波愁其事成耶祁天下人生闍羅
摩羅那闍老摩羅那死是爲十二因緣生死

四意何謂四身意念痛癢意念心意念法意
念是爲四意念四神足欲精進意慧是爲四
神足是爲法二十種因緣何謂身二十因緣
三事身所作何謂三殺盜婬身自不殺不得
教人殺身自不盜不得教人盜身自不婬不
得教人婬四事口所作何謂四兩舌惡口妄
言綺語口自不兩舌不得教人兩舌自不惡
口不得教人惡口自不妄言不得教人妄言
自不綺語不得教人綺語三事意所作何謂
三嫉妬瞋恚癡疑意自不嫉妬不得教人嫉

妬意自不瞋恚不得教人瞋恚意自不癡疑
不得教人癡疑身口意不得犯是十事不得
教人犯是爲身口意法二十種因緣何謂摩
訶般若波羅蜜二十因緣先世所念欲令一
切天下人皆作佛欲令一切天下人皆洞視
欲令一切天下人皆徹聽波羅蜜然知人意
欲令一切天下人皆知人意阿耨沙耶阿耨
沙耶然那知一切天下人意所念欲令一切
天下人皆知一切人意所念因利耶波利浮
利耶然那眼耳鼻舌身意因利佛所知欲令

一切天下人皆知佛現威神然那欲令一切
天下人皆知摩訶迦留祁然那佛慈心念一
切天下人欲令一切天下人薩耆浮然那皆
知一切天下人事欲令一切天下人皆知一
切人事阿那怒羅然那佛智慧一切天下鬼
神天神龍神皆不能禁制欲令一切天下人
皆知是智慧是爲摩訶般若波羅蜜二十種
因緣合會爲八十種因緣阿惟越致菩薩法
以過去當來今現在菩薩是爲八十種因緣
皆合會是爲菩薩法

第三時

南無佛今受惟逮法二十因緣行之自知宿命何謂二十有五因緣多福何謂五檀那福多尸福多念佛多所作善無量福多治正塔寺無量福多是五多福有五因緣護身何謂五護身護口護意護尸護戒護是爲五因緣護身菩薩有五意何謂五尸意好心善意布施意念善道意慧意是爲五意合會爲二十種因緣行之自知宿命乃致阿耨多羅三藐三菩何謂阿耨多羅天上天下無有在其上

者

第四時

南無佛今受四禪法何謂禪法菩薩坐禪一心念佛佛空無所有意便不復念貪婬五所欲已無貪婬五所欲便得一禪菩薩坐禪一心念法法亦空無所有意便無瞋恚痛癢已三八無瞋恚痛癢如是便得二禪菩薩坐禪一心念摩訶般若波羅蜜亦空無所有意便無愚癡如是便得三禪菩薩已得三禪諸惡已盡無所復念意清淨不動不搖便得四禪一心

不復轉自然得五句是爲菩薩行禪法

第五時

南無佛今受般若三昧法何謂三昧法菩薩
三昧慈哀念一切十方諸天人民父母兄弟
妻子怨家債主泥犁薜荔畜生諸在厄難勤
苦人及非人薩怛薩皆欲令解脫勤苦得出
生人道奉行六波羅蜜阿耨多羅三耶三菩
心是爲菩薩三昧法菩薩三昧等心護一切
十方諸天人民父母兄弟妻子怨家債主泥
犁薜荔畜生中人及非人薩怛薩皆欲令解

脫勤苦富樂安隱發阿耨多羅三耶三菩心
是爲菩薩三昧法菩薩三昧等意慈心哀愍
念一切十方諸天人民父母兄弟妻子怨家
債主泥犁薜荔畜生中人非人薩怛薩視之
護之如母親護赤子一切平等無有異意已
平等是爲三昧法從是自然得五句菩薩坐
起晝夜思惟常當平心等意爾乃爲菩薩三
昧法

第六時

南無佛南無菩薩南無摩訶薩今受三昧法

如菩薩摩訶薩今我持心所作當如虛空今持虛空作乎是故行菩薩道持心視天下萬民如一當如視父母兄弟妻子無異當等心視之今我歡喜爲十方天下人民作善是爲文殊師利菩薩三昧持是三昧戒具者文殊師利菩薩當來與共語持是三昧戒具者是爲諸菩薩中最尊是爲文殊師利菩薩三昧菩薩摩訶薩文殊師利三昧菩薩坐欲起時叉手念腹中所願言我是菩薩摩訶薩文殊師利菩薩我所作分檀布施用是故我得善

薩道若人從菩薩求目菩薩當以目與之若人從求身菩薩以身與之若人求財物菩薩當以財物與之常當念言我是菩薩文殊師利亦是菩薩今我當諦持是身與不妄菩薩常當念使十方天下人民安隱富樂如使十方人民勤苦我當念令安隱富樂解脫菩薩當諦持身法行菩薩道菩薩當急欲作沙門當持禪波羅蜜我急當至阿彌陀佛所我持是三昧急欲與水精瑠璃金銀共會相娛樂文殊師利菩薩愁闍名阿提波羅阿耨名阿

提調

第七時

南無佛南無法南無比丘僧南無諸摩訶薩
南無洹那鳩溜菩薩三昧道住止是故念十
方天下人民若在冥中者我何時當作大光
明如日月為十方人民作光明如菩薩當為
十方天下人民作大光明是三昧諦持心當
正要安心平心當為十方天下人民如日月
作光明是菩薩三昧道當為十方天下人民
心作平今十方有菩薩十方菩薩行三昧適

等用是月三昧如他菩薩亦用是三昧如洹
那鳩溜菩薩問釋迦文佛是三昧云何釋迦
文佛默然無所語洹那鳩溜復問三昧釋迦
文佛復無所語洹那鳩溜菩薩自念佛何等
心洹那鳩溜知佛心洹那鳩溜便起往為佛
作禮洹那鳩溜便搥捷推十方三昧菩薩皆
來會六萬菩薩皆前為佛作禮已皆坐洹那
鳩溜問佛當為十方天下人民平心三昧名
為何等為月三昧佛語六萬菩薩皆平心已
平心諸拘樓檀皆動搖不能住持佛威神安

天下是三昧名月三昧已得聞是三昧者皆當平心行之

第八時

南無佛南無法南無比丘僧南無諸菩薩南無摩訶薩南無文殊師利菩薩我自念命前世時已行菩薩道自念我已奉事三百億佛自念我前世為菩薩時常以慈悲喜護之心墜傷一切人非人及蚰飛蠕動之類恒為之感痛我常以經道勸勵開導之使得入正法遠去惡為善耳不受善惡之聲眼不視好醜

之色鼻不嗅臭香之氣口不嘗五味之味身不求麤細之飾意不求可欲之欲我自斷六我自斷三六事不得起耳得定不聞善惡之聲眼得定不視好醜之色鼻得定不嗅臭香之氣口得定不貪著五味之味身得定不知寒溫之痛癢意得定無復往來之思想身行檀波羅蜜但欲布施眼為尸波羅蜜但欲持戒耳為羸提波羅蜜但欲忍辱鼻為惟逮波羅蜜但欲精進口為禪波羅蜜但欲一心意為般若波羅蜜但欲智慧我當以是六事救

濟施惠一切我今來生復得見佛經戒復得
奉事三尊我今當復以六事教化一切廣利
法門開導衆人使成大道爲一切人非人作
唱導時當死死不犯淨戒時當死死不爲欲
惑時當死死不爲不可動是我本願人來
索身當以與之制其所索我不逆也是爲菩
薩九時之戒以平等心持之是爲持戒所以
爾者我爲十方諸佛故我爲諸經法故我爲
諸比丘僧故我爲諸菩薩摩訶薩故我爲十
方天下人非人蜎飛蠕動之類故我持是諸

事憂念衆生以故我今得菩薩道行諸菩薩
法是故菩薩道難值難聞聞之者皆得阿惟
越致我今持我身命歸十方諸佛一心不復
退轉

第九時

南無佛南無法南無比丘僧南無諸菩薩南
無摩訶薩南無文殊師利菩薩菩薩道難我
以身命救濟一切衆生無所愛惜菩薩不作
罪亦不畏罪宿命到來怨家債主至菩薩歡
喜畢罪亦不怖懼菩薩持法如法持戒如戒

菩薩以信故得作佛菩薩博讀衆經悉入諸道順化衆生菩薩常行慈心言語懦軟不中傷人意菩薩與妻子並居如養怨家常護其意菩薩視女人如虎狼師子如毒蛇菩薩不畏愛欲不能動菩薩意菩薩捨欲故愛欲不能得沾汙菩薩清淨之行如蓮華不於高山陸地生也菩薩於愛欲中生如蓮華雖於泥中生不爲泥塗所汙也菩薩戒內不戒外也外行如地內戒如水水以清淨懦軟爲行地以多容多受爲功德也一切百草樹木皆從

地得生長一切萬物皆從水得生活是故菩薩功德如地如水菩薩山居獨處亦不恐懼菩薩雖居家畜養妻子常如獨處恬然安定無復痛癢思想之念以故菩薩功德尊大巍巍堂堂無端無底無邊無限功德難稱難量是爲菩薩十時之戒菩薩常行四等心平等無異已信功德便得一住已得一住便得二住已得二住便得三住已得三住便得四住已得四住便得五住已得五住便得六住已得六住便得七住已得七住便得八住已得

八住便得九住已得九住便得十住已得十住便得作佛便度一切衆生是爲菩薩積累功德自致得道其有人隨我諷誦是經者既却諸惡得佛疾也見者聞者一時歡喜者既却已身無央數之罪令得十住信心以致得道常當以月十五日一日一夜誦讀是經其福蓋於三界中莫作障礙縛著之行是則遠離功德不爲菩薩道也

第十時

南無佛南無法南無比丘僧南無諸菩薩南

無檀那鳩溜菩薩南無文殊師利菩薩菩薩常慈心愍念一切人民見貧者富者豪者貴者卑賤者強健羸瘦怯弱者心常念之欲使齊等常願使十方平如水無山坑人民貧富等等無異壽命長短等等無異豪貴卑賤等等無異求道同心常願俱發大乘之業一切人非人皆發無上正真之道悉有智慧悉行布施無有慳貪悉持經戒悉能忍辱皆能精進一心入定見化三昧皆有漚沤拘舍羅見迷惑者願使之疾見正道陰冥者得觀光明

疾者皆使除愈強健各現色力陸行願使人
馬車牛肥壯人手足筋力強健財物安隱船
行者東西南北上水下水各得其願船車安
隱帆行調利賈市百倍千倍萬倍住止得處
賣買便利貴賤各得所願居家者妻子父母
公嫗皆使安隱水火盜賊疾病十三縣官無有居
官者常得安隱發心愛育人民家人富饒無
有貧窮憂厄苦劇者是為菩薩十一時戒平
等之行善男子善女人聞是歡喜皆得阿惟
越致諸天神地神山神皆來侍衛帶持是經

者一切災害不敢干犯是為菩薩已得神通
第十一時
南無佛南無法南無比丘僧南無諸菩薩摩
訶薩南無文殊師利菩薩菩薩從一數二隨
三止四觀五還六淨以次得道得須陀洹得
斯陀含阿那含得阿羅漢辟支佛皆不於中
住得佛道現三十二相八十種好紫金色十
種力四無所畏十八法不共八種大音聲亦
不於中住菩薩發大乘之業以僧那僧涅槃
脫一切人非人以波羅蜜示現衆人以慈悲

喜捨救濟衆人菩薩以懦軟伏諸剛強菩薩
以漚沍舍羅和合衆人菩薩以謙恭慈仁
安慰衆人菩薩以和悅歡喜降伏諸惡逆菩
薩以道力度諸愚癡菩薩以貞潔度諸愛欲
菩薩以大慈愍念衆生菩薩以省約絕諸財
寶菩薩以清淨斷諸醉酒菩薩以訥言正心
口忍辱菩薩以經行立於精進菩薩以少食
絕於睡卧菩薩以無欲輕身強健菩薩以無
瞋怒養於道德菩薩以無嫉妬合聚衆人菩
薩以功德歸流一切人非人是爲菩薩十二

時戒平等之行救濟一切衆生是爲飛行菩
薩功德具足有善心好意樂聞是經誦誦讀
是者是爲十住阿惟顏菩薩入水不沉入火
不燒索頭與頭索眼與眼索耳與耳肉鼻與
鼻投身虎口不惜身命是爲菩薩大士尊貴
功德難稱難量無端無底無邊無限不可度
量各尊承世尊經戒以自衛身行與是經合
者舉止得所善加精進善遠諸惡莫犯是犯
是者非爲菩薩也是爲菩薩具足正戒一生
補處旦暮朝晡當得作佛光明相好皆已照

現是爲功德成滿諸善已現威神具悉一切
皆敬伏無敢當菩薩者佛說菩薩功德十二
時正戒竟文殊師利菩薩及諸來會神通菩
薩飛行菩薩成就菩薩現化菩薩及八方上
下諸菩薩毖陀和菩薩羅隣那竭菩薩憍越
兜菩薩那迦達菩薩深彌菩薩摩訶須菩薩
愁菩薩因提達菩薩愁輪稠菩薩等合七萬
二千人皆大踊躍歡喜各現光明展轉相照
各各起正衣服前以頭腦著地爲佛作禮
第十二時

佛說菩薩戒十二時竟文殊師利白佛言菩
薩用何功德得是十住惟願天中天分別說
之佛言善哉善哉文殊師利菩薩摩訶薩多
所愛念多所安隱吾當爲汝具說其要諦聽
諦受文殊師利言受教佛言有十住菩薩功
德各有高下十八自有次第文殊師利言何等爲
十一住波藍質兜波菩薩法住佛言上頭見
師端正無比視面色無有猒無有逮者尊貴
無有能過者所教授無有能踰者見佛威神
儀法如是便稍入佛道中轉導之皆隨其意

教度脫之見勤苦者皆慙傷之稍稍解曉佛語信向之新發起意學佛道悉欲得了知佛智十難處悉欲逮得之何等爲十難處佛十種力是一者當供養佛二者當隨其所樂當教語之三者所生處皆尊貴四者天上天下無有能及者五者佛智慧悉逮得六者世世所生處得見無央數佛七者佛經悉逮得八者悉過度諸生死九者今脫去不久十者悉度脫十方人二住何等爲阿閼浮菩薩法住佛言有十意念十方人等何等爲十意一者

悉念世間善二者潔淨心三者皆安隱四者柔軟心五者悉愛等六者心念但欲布施與人七者心悉當護八者念人與我身無異九者心念十方人我視如師十者心念十方人視如佛阿閼浮菩薩法當多學經多學經已當獨處山獨處山當與善師從事與善師從事當在善師邊當易使當隨時隨時所作爲勇所作旣爲勇當學入慧中心所受法當悉持旣悉持悉持法當不忘也旣不忘者當安隱處山所以者何益於十方人故三住何等

爲喻阿闍菩薩法住者佛言入於諸法中用
十事何等爲十事一者諸所有皆無常二者
諸所有皆勤苦三者諸所有皆虛四者諸所
有皆非我所五者諸所有皆無主六者諸所
有皆無利也七者諸所有皆無所止八者諸
所有皆無所處九者諸所有皆無所著十者
一切無所有諸法悉入一法中一法悉入諸
法中是爲喻阿闍菩薩教法四住何等爲闍
摩期菩薩法住者佛言常願於佛處生有十
事一者不復還二者多深思於佛三者深思

於法四者念比丘僧視十方人五者思惟萬
物皆無所有六者十方佛刹皆虛空七者宿
命所作了無所有八者所有如幻皆虛空九
者諸所勤苦無所有十者泥洹虛空亦無所
有用是故生於佛法中是爲闍摩期菩薩教
法五住何等爲波喻三般菩薩法住者佛言
所信功德悉度十方人有十事一者悉護十
方人二者悉念十方人善三者悉念十方人
悉令安隱四者悉愛十方人五者悉哀念十
方人六者悉念十方人莫使作惡七者悉引

十方人著菩薩道中八者悉清淨於十方人
九者悉度脫十方人十者悉使十方人般泥
洹是爲波喻三般菩薩教法六住何等爲阿
者三般菩薩法住者佛言有十法深哀慈心
一者用人說佛善惡心無有異二者說經法
善惡心無有異三者說菩薩善惡心無有異
四者求菩薩道人共相道善惡心無有異五
者人言十方人有多少心無有異六者覩十
方人展轉相道善惡心無有異也七者中有
人說言十方人易脫難脫心無有異八者若

有人說法多少心無有異九者有人說法壞
心無有異十者有法處無法處心無有異是
爲阿者三般菩薩教法七住何等爲阿惟越
致菩薩法住者佛言有十事堅住不動一者
言有佛無佛不動還二者有法無法不動還
三者有菩薩無菩薩不動還四者有求索菩
薩無求索菩薩道者不動還五者持法得不
動還六者有諸過去佛無諸過去佛不動還
七者有諸當來佛無諸當來佛不動還八者
有現在佛無現在佛不動還九者佛智慧盡

不盡不動還十者當來過去現在世事呼若動不動還是爲阿惟越致菩薩教法八住何等爲鳩摩羅浮童男菩薩法住者佛言菩薩於十事中住一者身所行口所言心所念悉淨潔二者無有能得長短者三者心一返念在所欲生何所四者十方人知誰慈心者五者十方人所信用悉知六者十方人若干種悉知七者十方人所作爲悉知八者十方諸佛刹土成敗悉知九者得神足念飛在所至到十者諸悉淨潔是爲鳩摩羅浮童男菩薩

教法九住何等爲喻羅闍菩薩法住者佛言用十事得一者十方人所出生悉知二者十方人所繫恩愛悉知三者十方人所念本末所從來悉知四者十方人所住宿命所趣向悉知五者若干種諸法悉知六者十方人所念若干種變化悉知七者諸佛刹善惡壞敗悉知八者過去當來現在無央數世事悉知九者十方人等不等悉知十者教授十方人說虛空法悉知是爲喻羅闍菩薩教法十住何等爲阿惟顏菩薩法住者佛言菩薩入於

十智中能分別知有十事一者何因當感動
 十方諸佛刹中二者當明無央數佛刹中三
 者我日日當署置無央數佛刹中菩薩四者
 我日日當度脫無央數佛刹中人民五者我
 當安隱無央數佛刹中衆生六者十方人莫
 不聞我聲歡喜得度脫者七者悉念十方人
 民使得佛道皆捨家作沙門八者十方人所
 思想善惡我悉知之九者十方人我悉當內
 著佛道中悉使發菩薩意十者十方人我悉
 當度脫是阿喻羅闍菩薩了不能及知阿惟

顏身所行口所言心所念所作爲了不能及
 知阿惟顏菩薩事亦不能知神足念不能知
 飛行亦不能逮知阿惟顏菩薩當來過去今
 現在事是爲阿惟顏菩薩教法
 佛說菩薩內戒經

音釋

起音和繖先謙切讒鋤咸切搯張瓜切溜力救切
 切 懦乃箇切嫗於語切匄居太切威蒲未切